

## Мой молитвослов

### Канон чтомый за болящего

Песнь 1 Ирмос: Пресекаемое море жезлом древле, Израиль пройде яко по пустыни, и крестообразно яве предуготовляет стези. Сего ради поим во хвалении чудному Богу нашему, яко прославися. Припев: Милостиве Господи, услыши молитву раб Твоих, молящихся Тебе. В день печали, нашедшия на ны, к Тебе, Христе Спасе, припадающе, Твоя милости просим. Облегчи болезнь раба Твоего, изреки нам яко и сотнику: иди, се здрав есть отрок твой. Припев: Милостиве Господи, услыши молитву раб Твоих, молящихся Тебе. Мольбы и моления, с воздыханием к Тебе вопием, Сыне Божий, помилуй нас. Воздвигни со одра лежащего, яко разслабленного словом: возьми одр твой, глаголя, отпускаются ти греси твои. Слава: Твоего, Христе, образа подобию поклоняющеся, верою целуем, и болящему здравия просим, подражающе кровоточивей, яже подольца риз Твоих коснуса, и исцеление недуга прият. И ныне: Пречистая Госпоже Богородице, всем известная Помощница, не презри нас к Тебе припадающих, моли яко блага Твоего Сына и Бога нашего, дати здравие болящему, да Ты с нами прославляет.

Песнь 3 Ирмос: Иже от не сущих вся приведый, словом созидаемая, совершаемая духом, Вседержителю Вышний, в любви Твоей утверди мене. Припев: Милостиве Господи, услыши молитву раб Твоих, молящихся Тебе. Иже от тяжких болезней на земли повержен, к Тебе, Христе, с нами вопиет, подаждь здравие телеси его, яко же Иезекии плакавшуся к Тебе. Припев: Милостиве Господи, услыши молитву раб Твоих, молящихся Тебе. Призри, Господи, на наше смирение, и не помяни беззаконий наших, но веры ради болящего, яко прокаженного словом исцели ему болезнь, да Твое, Христе Боже, славится имя. Слава: Церковь, юже еси освятил, на ту, Христе, не даждь поношения, но воздвигни невидимо в недуге на одре лежащего, в нейже молим Ти ся: да не рекут невернии, где есть Бог их. И ныне: К Твоему пречистому, Богородице, образу руце воздеюще вопием, услыши раб Твоих молитву и спаси в болезни лежащего, да от болезни востав, воздаст обеты, яже в печали глаголаша уста его.

Седален, глас 8-й: На одре греховней лежаща мя, и страстьми уязвена, и якоже воздвигл еси Петрову тещу и спасе разслабленного носима со одром, тако и ныне посети, Милостиве, болящего, понесый недуги рода нашего. Тебе Единого вемы, терпелива и милосерда, милостива Врача душам и телесем, Христа Бога нашего, наводяща недуги и паки исцеляюща, подавающа прощение кающимся о согрешениях, Единого Милосердаго и Милостиваго. Слава: Аз грешный плачуся на одре своем лежа, прощение ми подаждь, Христе Боже, и от болезни сея воздвигни мя, и яже есмь от юности грехи сотворил, избыти ми сих молитвами Богородицы даруй. И ныне: Умилосердися и спаси мя, воздвигни мя от одра болезненного, мощь бо моя во мне изнеможе и весь нечаянием одержим есмь, Мати Божия Пречистая, исцели недугующа люте, Ты бо еси Помощница Христианом.

Песнь 4 Ирмос: Положил еси к нам твердую любовь, Господи: Единородного бо Твоего Сына за ны на смерть дал еси, темже Ти зовем благодаряще: слава силе Твоей, Господи. Припев: Милостиве Господи, услыши молитву раб Твоих, молящихся Тебе. Уже отчаянна лютым недугом и к смерти приближившася, возврати, Христе, на живот и даждь плачущимся утеху, да вси прославляем Твоя святая чудеса. Припев: Милостиве Господи, услыши молитву раб

Твоих, молящихся Тебе. К Тебе, Творче, каемся в своих гресех, яко не хочеши смерти грешници, оживи, уздрави болящего, да востав послужит Ти, исповедуя с нами Твою благодать. Слава: Слезы Манассиины, Ниневитян покаяние, Давидово исповедание приим, вскоре спасл еси, и наши молитвы ныне приими, даждь здравие болящему, о нем же Ты молим. И ныне: Подаждь нам Твою милость, Госпоже, всегда на Тя надеющимся, испроси здравие болящему, врачевнии Твои руце с Предтечею, Богородице, ко Господу Богу простираючи.

Песнь 5 Ирмос: На земли Невидимый явился еси, и человеком волею сожил еси Непостижимый, и к Тебе утренююще, воспеваем Тя, Человеколюбче. Припев: Милостиве Господи, услыши молитву раб Твоих, молящихся Тебе. Дщерь Иаинову уже умершу, яко Бог оживил еси, и ныне возведи, Христе Боже, от врат смертных болящего, Ты бо еси Путь и Живот всем. Припев: Милостиве Господи, услыши молитву раб Твоих, молящихся Тебе. Сына вдовича оживив Спасе, и тоя слезы преложив на радость, спаси от недуга тлеющего раба Твоего, да и наша скорбь и болезнь на радость приидет. Слава: Огненну болезнь тещи Петрове прикосновением Твоим исцелив, и ныне возстави болящего раба Твоего, да востав яко Иона, послужит Ти. И ныне: Скорбнии, смиреннии, грешнии, не имущии дерзновения к Тебе, Пречистая Богомати, вопием, умоли Сына Твоего Христа дати болящему здравие телеси.

Песнь 6 Ирмос: Бездна последняя грехов обыде мя, и исчезает дух мой: но прострый, Владыко, высокую Твою мышцу, яко Петра мя, Управителю, спаси. Припев: Милостиве Господи, услыши молитву раб Твоих, молящихся Тебе. Бездну милосердия и милости имея, Христе Боже, услыши моления раб Твоих. Ты бо еси Петром Тавифу воскресил, Ты и ныне в болезни лежащего воздвигни, послушав церковных молитвенник. Припев: Милостиве Господи, услыши молитву раб Твоих, молящихся Тебе. Врачу душам и телесем нашим, понесый недуги всего мира, Христе, и Енея Павлом исцеливый, Ты и ныне болящего исцели святых апостол молитвами. Слава: Преложи, Христе, на радость рыдание о недужном скорбящем, да Твою получивше милость, внидут в дом Твой со обетными дарми, славяще Тя в Троице Единого Бога. И ныне: Приидите, о друзи, поклонимся молящегося о болящем Божией Матери. Та бо имеет власть недужныя исцеляти, со безмездником вкупе, духовным невидимо помазующе маслом.

Кондак, глас 3-й: Душу мою, Господи, во гресех всяческих, безместными деяньми разслаблену воздвигни божественным Твоим человеколюбием, яко же и разслабленного воздвигл еси древле, да зову Ти спасаем: щедре Христе, даждь ми исцеление.

Икос: Иже руки Своей горстию содержи концы, Иисусе Боже, Иже Отцу собезначальный и Духу Святому совладычествуя, яко плотию явился еси недуги исцеляя и страсти очистил еси, слепыя просветил еси, и разслабленного словом Божественным совоставил еси, сего право ходяща сотворив и одр повелел еси на раму взяти. Темже вси с ним воспеваем и поем: щедре Христе, даждь ми исцеление.

Песнь 7 Ирмос: Прежде образу златому, персидскому чтилищу отроцы не поклонишася, трие поюще посреде пещи: отцев Боже, благословен еси. Припев: Милостиве Господи, услыши молитву раб Твоих, молящихся Тебе. О, Кресте Пресвятый Христов, честное Древо Животное. Тобою смерть погибе и мертвии воскресоша, и ныне болящего исцели и оживи, якоже при Елене умершую девицу. Припев: Милостиве Господи, услыши молитву раб Твоих,

молящихся Тебе. Долгую и лютую болезнь Иовлю на гноищи и в червех, того молящаяся, словом изцелил еси, Господи. И ныне же в церкви о болящем молим Тя: яко благ, изцели невидимо молитвами святых Твоих. Слава: Все веми, яко умрети нам есть, Тебе Богу тако изволившу, но на мало время, Милостиве, здравия просим болящему, премени от смерти на живот, даждь скорбящим утеху. И ныне: Пособствуй и помогай нашему сиротству, Богородице, Ты бо веши время и час, когда умолиши Сына Твоего и Бога нашего, дати болящему здравие и прощение от всех грех.

Песнь 8 Ирмос: Служити Живому Богу, в Вавилоне отроцы претерпевше, о мусикийских органех нерадиша, и посреде пламене стояще, боголепную песнь воспеваху, глаголюще: благословите все дела Господня Господа. Припев: Милостиве Господи, услыши молитву раб Твоих, молящихся Тебе. Милость покажи, Владыко, в болезни раба Твоего, и скоро изцели, милостиве Христе Боже, и аще смерти не предаждь судней, да Ти покаяние воздаст. Сам бо рекл еси: не хочу смерти грешници. Припев: Милостиве Господи, услыши молитву раб Твоих, молящихся Тебе. Господи милостиве, Твоя преславная чудеса да и до нас ныне достигнут: бесы прожени, недуги погуби, раны изцели, болезни уврачуй, и потворы и чародеяния и всякия язвы избави ны. Слава: Запретивый, Христе, морским ветром, и страх ученик на радость преложивый, и ныне запрети тяжким болезнем, труждающим раба Твоего, да все возвеселимся хваляща Тя во веки. И ныне: Избави, Богородице, от обышедших ны печалей, различных недугов, отравы же и чародейства, и бесовскаго мечтания, и от навета злых человек и от напрасныя смерти, молим Ти ся.

Песнь 9 Ирмос: На Синайстей горе виде Тя в купине Моисей, неопально огонь Божества заченшую во чреве: Даниила же Тя виде гору несекомую, жезл прозябший, Исайа взываше, от кореня Давидова. Припев: Милостиве Господи, услыши молитву раб Твоих, молящихся Тебе. Источниче жизни, подателю, Христе, милости, не отврати лица Твоего от нас. Облегчи болезнь утруженному болезнию, и воздвигни яко Фаддеом Авгаря, да присно Тебе славят со Отцем и Святым Духом. Припев: Милостиве Господи, услыши молитву раб Твоих, молящихся Тебе. Евангельскому верующе гласу, Твоего ищем обета, Христе: просите бо, рече, и дастся вам. Тем и ныне предстояще молим Тя, возстави со одра здрава лютым повержена недугом, да Тя с нами вкупе величает. Слава: Мучимый недугом, внутри невидимыми ранами, Тебе, Христе, с нами вопиет, не нам, Господи, не нас ради, все бо мы исполнены грехов, но Матерними Твоими и Предтечевыми молитвами даждь исцеление болящему, да Тя все возвеличим. И ныне: Божия Мати Пречистая, со всеми святыми призываем Тя, со ангелы и архангелы, с пророки и патриархи, со апостолы, с преподобными и праведными молися Христу Богу нашему дати здравие болящему, да Тя все величаем.

Молитва Боже сильный, милостию строяй все на спасение роду человеческому, посети раба Твоего сего (имя), нарицающа имя Христа Твоего, исцели его от всякого недуга плотскаго: и отпусти грех и греховныя соблазны, и всяку напасть, и всяко нашествие неприязнено далече сотвори от раба Твоего. И воздвигни от одра греховнаго, и устрой его во святую Твою Церковь здрава душою и телом, и дела добрыми славящаго со всеми людьми имя Христа Твоего, яко Тебе славу возсылаем, со Безначальным Ти Сыном и со Святым Духом, ныне и присно и во веки веков. Аминь.

Молитва о болящих

Владыко, Вседержителю, Святы́й Царю́, наказу́й и не умерщвля́й, утвержда́й низпада́ющыя и возводи́й низверженныя, телесныя человеков скорби исправля́й, моли́мся Тебе, Боже наш, раба Твоего (имя), немоществую́ща посети́ ми́лостию Твоею, прости ему́ всякое согреше́ние вольное и невольное. Ей, Господи, лечебную Твою́ силу с небесе́ низпосли, прикоснися телеси́, угаси́ огневи́цу, укроти́ страсть и всякую немощь тая́щуюся, бу́ди врач раба Твоего (имя), воздви́гни его́ от одра́ боле́зненного и от ло́жа озлобле́ния це́ла и всесоверше́нна, дару́й его́ Церкви Твоей благоугожда́юща и творя́ща волю́ Твою́, Твое́ бо есть, е́же ми́ловати и спаса́ти ны, Боже наш, и Тебе́ славу возсыла́ем, Отцу́ и Сыну́ и Святому́ Духу́, ны́не и при́сно, и во веки веков. Ами́нь.

## Молитвы святой блаженной Матроне Московской

### Молитва 1-я святой Матроне Московской

О́блаже́нная ма́ти Матро́но, услы́ши и приими́ ны́не на́с, гре́шных, моля́щихся тебе́, нави́кшая во все́м житии́ твое́м приима́ти и выслу́шивати всех стра́ждущих и скорбя́щих, с ве́рою и надеждою к твоему́ заступле́нию и помощи́ прибегающих, скорое по́мощение и чудесное исцеление́ всем подава́ющи; да не оску́деет и ны́не милосе́рдие твое́ к на́м, недостойным, мяту́щимся в многосу́етнем ми́ре се́м и ни́гдеже обрета́ющим утеше́ния и сострада́ния в скорбе́х душе́вных и по́мощи в боле́знях теле́сных: исцели́ боле́зни на́ша, изба́ви от искуше́ний и мучи́тельства диа́вола, стра́стно вою́ющаго, помози́ донести́ житейский свой Крест, снести́ вся́ тя́готы жития́ и не потеря́ти в не́м образ Бо́жий, ве́ру правосла́вную до́ конца́ дне́й на́ших сохра́нити, упова́ние и наде́жду на Бо́га кре́пкую имети́ и нелицеме́рную любо́вь к бли́жним; помози́ на́м по отше́ствию из жития́ сего́ дости́гнути Ца́рствия Небе́снаго со́ все́ми угоди́вшими Бо́гу, прославля́юще милосе́рдие и бла́гость Отца́ Небе́снаго, в Тро́ице сла́вимаго, Отца́ и Сы́на и Свята́го Ду́ха, во́ веки веко́в. Ами́нь.

### Молитва 2-я святой Матроне Московской

О, блаженная ма́ти Матро́но, душею́ на небеси́ пред Престо́лом Божиим предстоя́щи, телом же на земли́ почива́ющи, и данною́ ти свы́ше благода́тию различны́е чудеса́ источа́ющи. При́зри ны́не ми́лостивным твои́м о́ком на ны́ (имена), гре́шныя, в скор́бех, боле́знях и грехо́вных искуше́ниих дни своя́ иждива́ющия, уте́ши ны́, отча́йныя, исцели́ недуги́ наши́ лю́тыя, от Бога́ нам по грехом нашим́ попу́щае́мая, изба́ви нас от мно́гих бед и обстоя́ний, умоли́ Го́спода на́шего Иису́са Христа́ прости́ти нам вся на́ша согреше́ния, беззакония́ и грехопале́ния, и́миже мы́ от юности́ на́шей да́же до настоя́щаго дне́ и ча́са согреши́хом, да твои́ми моли́твами получи́вше благода́ть и ве́лию ми́лость, просла́вим в Тро́ице Еди́ного Бо́га, Отца́ и Сы́на, и Свята́го Ду́ха, ны́не и при́сно и во ве́ки веко́в. Ами́нь.

### Иконы